



Na osnovu člana 18. Statuta Općine Maglaj („Službene novine Općine Maglaj“, broj: 8/07, 3/08 i 6/08.) i člana 26. Odluke o javnim priznanjima («Službene novine Općine Maglaj», broj: 4/15) na prijedlog Komisije Općinskog vijeća za dodjelu javnih priznanja, Općinsko vijeće Maglaj na sjednici održanoj dana \_\_\_\_\_ godine, d o n o s i

## **O D L U K U**

### **o dodjeli javnih priznanja općine Maglaj za 2020.godinu**

#### **Član 1.**

Ovom Odlukom, a u skladu sa Odlukom o javnim priznanjima Maglaja dodjeljuju se javna priznanja Maglaja za 2020.godinu.

#### **Član 2.**

Javna priznanja dodjeljuju se slijedećim:

- |                                      |   |   |
|--------------------------------------|---|---|
| <b>1. „Grb Maglaja“</b>              | - | <b>Musli Totaj i<br/>Budo export</b>      |
| <b>2. „Plaketa Maglaja“</b>          | - | <b>Dr. Mladena Lazić i<br/>Master S</b>   |
| <b>3. „Maglajska lenta“</b>          | - | <b>Hasan Lepić</b>                        |
| <b>4. „Počasni građanin Maglaja“</b> | - | <b>Erna Sejfulović i<br/>Alma Čardžić</b> |

Pisana obrazloženja za predložene kandidate za javna priznanja nalaze se u prilogu ove Odluke i njen su sastavni dio.

#### **Član 3.**

Javna priznanja iz člana 2. ove Odluke bit će uručena na svečanoj sjednici Općinskog vijeća u povodu Dana Maglaja – «18.septembra», a u skladu sa Odlukom Općinskog vijeća o javnim priznanjima Maglaja.

#### **Član 4.**

O dodijeljenim javnim priznanjima vodi se jedinstvena evidencija u Službi Općinskog načelnika i Općinskog vijeća.

#### **Član 5.**

Ova Odluka stupa na snagu danom donošenja i ima se objaviti u «Službenim novinama Općine Maglaj».

Broj: 02-04-1- \_\_\_\_\_ /20  
Maglaj, \_\_\_\_\_ 2020. godine

**PREDSJEDAVALA**

Svjetlana Zamboni

## O b r a z l o ž e n j e

„Grb Maglaja“ je javno priznanje koje se u jednoj kalendarskoj godini može dodijeliti kao 1 (jedna) pojedinačna i 1 (jedna) kolektivna nagrada, ukupno 2 (dva) „Grba“.

„Grb Maglaja“ se dodjeljuje građanima Maglaja i drugim licima koja rade i djeluju na području općine Maglaj, privrednim društvima, ustanovama, udruženjima građana i drugim pravnim subjektima za doprinos u oslobođenju i odbrani Maglaja i izuzetne zasluge i postignute rezultate u teorijskom i praktičnom radu na unapređenju nauke, privrede, obrazovanja, kulture, umjetnosti, sporta, zdravstva, socijalne brige i dječje zaštite, unapređenje i afirmaciju tolerancije, kulture dijaloga, zaštiti i afirmaciji ljudskih prava i sloboda garantovanih međunarodnim konvencijama, Ustavom i zakonima, kao i spašavanje ljudi, imovine, unapređenje demokratije i suživota.

„Grb Maglaja“ istom licu ili instituciji može se dodijeliti samo jedanput.

### **„Grb Maglaja“ Musli Totaj**

Musli Totaj je vlasnik pekare „Non-stop“ i u Maglaju radi već dugi niz godina. Oženjen je i otac dvoje djece. Građanima je poznat po svojim dobrim djelima i donacijama. Njegov humani i kvalitetan rad itekako je bio vidljiv tokom 2014. godine, kada su građani općine Maglaj, kao i on sam bili poplavljeni i izgubili svu svoju imovinu. Tada je donirao besplatno pekarske proizvode kako bi na taj način olakšao svakodnevnicu građana koji su tada bili u velikoj nevjerici. Ove godine, kada je u toku pandemija COVID-19, pokazao je onu ljudsku veličinu i opet priskočio u pomoć onima kojima je pomoć bila najpotrebnija. Svoje proizvode je građanima prodavao po duplo nižim cijenama, te sve svoje uposlenike ostavio u radnom odnosu bez obzira na krizu koja se tada nazirala. Također, od svog dolaska u Maglaj donator je i pokrovitelj brojnih kulturnih i sportskih događaja.

### **„Grb Maglaja“ Budo export**

Budo export d.o.o. Žepče je preduzeće koje posluje dugi niz godina. Broji 180 uposlenih, od čega se u ovoj kompaniji nalazi blizu 120 uposlenika sa novošeherskog područja. Sve ovo svjedoči namjeri vlasnika za upošljavanjem kadra sa ovog područja. Preduzeće je 90 % izvozno orjentisano, te saraduje sa prepoznatljivim kompanijama širom EU. Jedna je od vodećih kompanija u ZDK i šire u oblasti proizvodnje visoko kvalitetnih masivnih ploča za namještaj. Kompanija je od izuzetnog značaja za novošeherski kraj, ali i općinu Maglaj. Važno je napomenuti da ova kompanija uzima učešće kroz finansijsku podršku u svim kulturnim i sportskim manifestacijama u organizaciji Općine Maglaj. Također, kompanija je vlastitim sredstvima izvršila rekonstrukciju i sanaciju dijela puta na novošeherskom kraju, koji osim za potrebe kompanije koristi i lokalno stanovništvo.

„Plaketa Maglaja“ dodjeljuje se poduzetnicima i privrednim društvima za vidljiv doprinos u privrednom napretku općine Maglaj u protekloj godini.

Istim kolektivima ili pojedincima „Plaketa Maglaja“ može biti dodijeljena jedanput u 5 (pet) godina.

### **„Plaketa Maglaja“ Dr.Mladena Lazić**

Dr. Mladena Lazić rođena je 12.05.1975. godine i uposlena je u JU Dom zdravlja Maglaj od 2004. godine kao doktor opće prakse. U novembru 2013. godine specijalizirala je pneumoftiziologiju i od tada radi kao specijalista pneumoftiziolog u Domu zdravlja Maglaj. Pored toga što je vrsni doktor i dijagnostičar, osobine koje krasi Mladenu jesu odgovornost, profesionalnost i humanost, kao i velika briga prema pacijentima. Posebnu zahvalnost dugujemo njenom predanom i neprekidnom radu tokom pandemije korona virusa, kada je aktivno 24 sata učestvovala u otkrivanju pacijenata zaraženih COVID-19. Ni izolacija u koju je prinudno morala ići, nije je spriječila da uz pomoć tehnologije nastavi

obavljati svoj posao od kuće i pravovremeno prepoznati potencijalno zaražene, koji su upućeni na dalja testiranja.

**„Plaketa Maglaja  
Master S**

Preduzeće Master S d.o.o Maglaj osnovano je 1996. godine u Sarajevu, a 1997. godine otvorena je poslovna jedinica u Maglaju. Godine 2002. sjedište je prebačeno u Maglaj. Bave se proizvodnjom kartonske i papirne ambalaže, a proizvodi su izrađeni od najkvalitetnijih materijala. Proizvode sve vrste kartonskih kutija - amerikan, štancane, kaširane i jumbo, koje se mogu izrađivati od svih vrsta kartona sa mogućnošću flekso štampe. Također, proizvode i kvalitetne plastificirane kese sa štampom. Kompanija Master S d.o.o. Maglaj je rad i poslovanje uskladila sa zahtjevima međunarodnog standarda ISO 9001:2015, a certifikat za isto je izdan od strane TÜV Rheinland - Certificate Registr. Ovaj privredni subjekat godinama doprinosi privrednom razvoju općine Maglaj, te finansijski podržava kulturna i sportska dešavanja.

„Maglajska lenta“ dodjeljuje se pojedincima koji su kroz svoj životni vijek svojim radom i djelovanjem ostavili vidljiv i prepoznatljiv trag i postali prepoznatljivi građani lokalne zajednice. Istim pojedincima „Maglajska lenta“ se može dodijeliti samo jednom.

**«Maglajska lenta»  
Posthumno  
Hasan Lepić**

Lepić Hasan, rođen je 25.11.1920. godine u Novom Šeheru, gdje je proveo cijeli svoj životni vijek. Stolar po zanimanju, cijelog života je svojim nesebičnim angažmanom doprinio lokalnoj zajednici. Pronašao je, gotovo samostalno iskopao i cijevima doveo pitku vodu Cicmanku, čime je riješeno pitanje vodosnabdijevanja novošeherskog kraja. Zahvaljujući Hasanovom poduhvatu, Novi Šehir nikada nije imao redukciju vode, te se i dan danas iz ovog izvora vodom snabdijevaju domaćinstva ovog područja. Lično je zakopao kamen temeljac za ambulantu u Novom Šeheru. Posthumno je dobio zahvalnicu od Antifašista za spomenik kod ambulante. Bio je dio ekipe koja je ručno pravila ciglu i gradila salu u kojoj su se, u to vrijeme, u Novom Šeheru održavali kulturni događaji. Pored toga, bio je učesnik NOB-a i NOR-a, te je i na taj način dokazao svoj patriotizam, te dao doprinos odbrani i kasnijoj izgradnji lokalne zajednice. Bez obzira na svoj angažman, Salih je bio skroman čovjek i nije volio da se eksponira. Sve što je radio bilo je za opću dobrobit, a ne za vlastitu korist, niti za pohvale s bilo koje strane. Stanovnici Novog Šehera trebaju se s ponosom sjećati ovoga velikana, jer i dan danas uživaju u plodovima njegovog truda i rada. Neka njegov rad bude primjer novim generacijama, kako treba da se bore i zalažu za dobrobit svoje lokalne zajednice.

Počasnim građaninom Maglaja može se proglasiti lice posebno zaslužno za afirmaciju vrijednosti demokratskog društva, historijskih događaja i tradicija Bosne i Hercegovine, položaja i ugleda Maglaja i njegovih odnosa sa drugim gradovima i općinama u zemlji i inostranstvu, te razvoj Maglaja ili pojedinih djelatnosti, državnik ili službenik druge države, član međunarodne organizacije odnosno organizacije druge države posebno zaslužan za Maglaj i Bosnu i Hercegovinu u jačanju njihovog ugleda na opće prihvaćenim načelima savremenog svijeta.

**„Počasni građanin Maglaja“  
Erna Sejfulović**

Erna Sejfulović, djevojački Jusufbašić rođena je 08.07.1974. godine u Maglaju gdje je okončala svoje prve srednjoškolske dane. Školovanje nastavlja u Tuzli gdje danas radi kao glavna medicinska sestra u Medical Institute Bayer- stari Centar za srce.

Za Maglaj je vežu posebne uspomene i nerijetko ističe svoje djetinjstvo i činjenicu da uspomene na Maglaj zauvijek ostaju urezane u sjećanje. Iako godinama živi i radi u Tuzli, Maglaj ne zaboravlja. Tome svjedoči i neosporna činjenica da je uvijek na usluzi Maglajkama i Maglajlijama koji zbog svog zdravstvenog stanja budu upućeni u Kliniku za srce. Rado ističe ljubav prema svom pozivu i naglašava da ukoliko bi ponovo mogla birati, odabrala bi isto.

Humanost, kao čovjekova najveća vrlina sa kojom se moraš roditi, a vremenom je nadograđuješ i težiš ka tome da učiniš što više dobrih djela je ono što krase ovu našu Maglajku. U znak zahvalnosti za svu podršku, pažnju, humanost i brigu koju upućuje svim sugrađanima čije zdravstveno stanje zahtjeva posjetu Centru za srce, dodjeljuje joj se ovo priznanje.

**„Počasni građanin Maglaja“  
Alma Čardžić**

Alma Čardžić rođena je 10. 03. 1968. godine u Maglaju. Kao dijete je pokazala sposobnost i sklonost ka muzici, te svoje prve značajne korake napravila na festivalu „Studentsko ljeto“ u Maglaju gdje je bila iste godine pobjednik. Njeni prvi profesionalni koraci zabilježeni su 1991. godine kada snima nekoliko pjesama koje su bile veoma zapažene zahvaljujući njenoj vrhunskoj interpretaciji. Godine 1992. nastupa na "Takmičenju za pjesmu Evrovizije" , 1994. godine predstavlja BiH na "Takmičenju za pjesmu evrovizije" u Dublinu, a 1997. godine po drugi puta predstavlja BiH na "Eurosongu". Gdje god se pojavi naglašava svoju ljubav prema Maglaju i promoviše vrijednost i značaj ovog malog grada u kojem žive ljudi velikog srca, kako to često ističe. Uvijek na svojstven način podržava Maglaj u njegovim dobrim i lošim danima.

Spisak svih dostavljenih prijedloga za dodjelu javnih priznanja za 2020. godinu.

Na raspisani javni oglas dostavljeno je 7 ( sedam ) koverata sa prijedlozima kako slijedi:

1. MZ Bijela ploča, predložili su – Eldina Mehinagića- ostavili Komisiji da odluči koje priznanje;
2. Nedžad Ahmetbegović i Elvin Bradarić, predložili su -  
- Jasmina Begića i Envera Kotorića- „Plaketa Maglaja“ ;
3. Načelnik općine Mirsad Mahmutagić, predložio je:  
- Master S- „Grb Maglaja“  
- Budo export- „Grb Maglaja“  
- Alma Čardžić- „Počasni građanin Maglaja“;
4. Mještani MZ Misurići-Jelovac, predložili su  
- Samira Fetića- „Grb Maglaja“, „Plaketa Maglaja“ ili „Maglajska lenta“;
5. OO SDP Maglaj, predložili su:  
- Hasan Lepić- posthumno „Grb Maglaja“ ili „Maglajska lenta“  
- Hana Čizmić i posthumno Dinko Čizmić- „Grb Maglaja“, „Plaketa Maglaja“, „Maglajska lenta“ ili „Počasni građanin Maglaja“.  
- Erna Sejfulović- „Grb Maglaja“ ili „Počasni građanin“  
- Dr. Mladena Lazić- „Grb Maglaja“, „Plaketa Maglaja“ ili „Počasni građanin“;
6. MZ Jablanica, predložili su:  
- Načelnika općine Mirsada Mahmutagića- „Grb Maglaja“;
7. Udruženje penzionera Maglaj, predložili su:  
- Musli Totaj- „Grb Maglaja“;

Obradivač

Emina Hasanić, Stručni savjetnik za poslove Općinskog načelnika i Općinskog vijeća